

**Date – 05/04/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Vawiin khan Isua Krista, thihna hneha a thawhleha ni, Easter Sunday pualin Mizoram chhunga kohhran hrang hrangin hlim leh urhsun takin hun an hmang.
2. Home Minister Pu K. Sapdanga'n chuan 'Operation Jericho' hming vuaha ruihhlo do beihpui thlak mek chu chhonzawm zel a ni, a ti.
3. Food, Civil Supplies & Consumer Affairs department chuan thuchhuah siamin tun dinhmunah tuialhthei leh eirawngbawlina gas dinhmun a that thu an sawi.
4. Petroleum & Natural Gas Minister, Hardeep Singh Puri-a'n Iran tiamin India-in ram 40 chuang atangin tuialhthei thlitfim loh a chaw lut tih sawiin a man chungchangah Iran leh India inkarah harsatna a awm lo, a ti.



**EASTER**

Vawiin khan Isua Krista, thihna hneha a thawhleha ni, Easter Sunday pualin Mizoram chhunga kohhran hrang hrangin hlim leh urhsun takin hun an hmanga, zingkarah thalai leh Kohhran huaihawtin Sunrise Service Biak In chhungah leh Biak In kawt remchangah an hmang a ni. Kohhran tam zawkah chuan chawhma, chawhnu leh zanah Easter Sunday pualin hun hman chhonzawm a ni a, Kohhran thenkhatah chuan heng inkhawmah te hian thupui inang an nei a, chawhma inkhawm banah thingpui ruai an buatsaih baw a, inkhawm pangngai bakah Kohhran thenkhat chuan lengkhawmin hun an hmang baw. Kohhran hrang hrangah Kohhran thalai leh naupangte'n nizan atang khan Easter artui te cheiin inkhawm te hnenah an sem a ni.

Presbyterian kohhran chuan thupui thuhmun, chawhmaah 'Isua thawh leh thu zep bo an tum', chawhnu inkhawmah 'Sawmtute hnar ngai lo Lal Isua' tih leh zan inkhawmah 'Ringtute nghahfak - Thawhleha' tih te thupui an nei a. Baptist Kohhran tam zawkah chuan chawhma leh zanah Easter Sunday pualin hun an hmang a, chawhma banah puitling leh naupangin a hrangin Sunday School an nei tel baw a ni. Salvation Army te chuan zingkarah Isua Krista thawhleha puangin Corp hrang

hranga band ten rimawi an tum a, chhun leh zanah Easter Sunday pualin inkhawm leh hun hrang hrang an buatsaih bawk.

United Pentecostal Church - Mizoram leh North East India te chuan an remchan angin anmahni kohhran theuhah hun an buatsaih bawk a. Thingpui ruai an buatsaih tlangpui a, kohhran thenkhatah chuan tlaiah ruai an theh bawk a ni.

Catholic kohhran chuan Inrinni zan khan Easter Vigil hmangin Isua thawhleha Easter chu ropui takin an hmang a. “Krista chu eng a ni” tih lantir na’n Easter Vigil ah hian mei thar lak a ni a, Biak-in kawt atangin sathau khawnvar te chhi kaiin Biak-in chhungah kawng zawh luh niin, inkhawm urhsun in a chhunzawm a, Thawhleha puanchhuahna ‘Easter proclamation’ hun hman a ni a. He hunah hian tui malsawmna leh thu a rawngbawlina hman a ni a, baptisma a thutiam te lak thar lehna hun hman a ni bawk. Easter inkhawm hi Catholic Kohhran ah chuan inkhawm zawnga urhsun ber niin, vawiin Easter Pathianni ah pawh Mass buatsaih leh a ni a, tualchhung kohhran tam tak, a bikin thingtlang lamah chuan Easter ruai an theh a. Zan lamah sathau khawnvar chhi engin Isua thawhleha kawngzawh (Easter procession) huaihawtin Mawmbati kawngzawh hun an hmang bawk ang. Catholic kohhran te hian khawvel pumah inkhawmna hi in ang vek in an hmang a ni.

He tih lai hian Vice President Pu C.P. Radhakrishnan, Prime Minister Pu Narendra Modi, Lok Sabha Speaker Pu Om Birla, Lok Sabha Leader of Opposition Pu Rahul Gandhi, President hlui Pu Ram Nath Govind leh ram hruaitu hrang hrangte bakah Mizoram larsap Gen. VK Singh te chuan ram chhunga Kristiante chu Easter chibai bukin duhsakna an hlan a ni.



## **OPERATION JERICHO**

Home Minister Pu K. Sapdanga chuan ‘Operation Jericho’ hming vuaha ruihhlo do beihpui thlak mek chu chhunzawm zel a ni, a ti.

Pu K. Sapdanga’n Akashvani News Aizawl a hrilh danin Operation Jericho hi March ni 31 khan tawp rih angin lang mah se ruihhlo do beihpui hi tha thlah lova chhunzawm zel a nih thu a sawi a. State thenkhata inthlan a awm dawn avangin Mizoram Police company 6 lai Assam state assembly inthlanna a duty turin tirh an nih thu a sawi a. He tianga Police indaih lohna a nasat tak avang hian Champhai district-a Myanmar ramri hrula ruihhlo do beihpui thlak hna thawk tura Police dahte pawh hnuhdawh an ngaih thu a sawi a. He tih rual hian Champhai district bakah chhim lam, Lawngtlai leh Siaha district te, Manipur ramri dep Saitual leh Khawzawl district lamah te ruihhlo tawlhurutute’n hlet an chhuah tak avangin a theih ang anga he’ng district-a Police tam zawk ruahman tum mek a ni a ti a. A hma anga Operation Jericho hmanga ruihhlo do beihpui a siruk-la a chhunzawm leh chungchang chu sawiho chhoh mek a nih thu a sawi bawk.

April ni 1 atang khan Mizoramah ruihhlo tawlhruk leh dan kengkawhtute’n an man a pung hle a. Ni hnih/khat chhung lek pawhin heroin tam tham tak man a ni. He mi chungchangah hian Home Minister chuan chhim lama Myanmar ramri hrul a awm district-te bakah Manipur ramri kal tlanga ruihhlo tawlhurutute an insawn tih thu an

dawng niin a sawi a. Champhai district chauh ni lo, chhim lam leh Manipur ramri lamah te pawh ruihhlo lo lut tur veng tura thapui an thawh mek thu a sawi bawk a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### OIL SITUATION

Food, Civil Supplies & Consumer Affairs department chuan thuchhuah siamin tun dinhmunah tuialhthei leh eirawngbawlina gas dinhmun a that thu an sawi.

Nimina thuchhuah an siamah he thu hi sawiin Supply department chuan tunlai geo politics avangin eirawngbawlina gas leh tuialhthei a harsatna thleng thei lakah Mizoram sorkar chuan ngawrh takin hma a la reng tih an sawi a. Tun dinhmunah eirawngbawlina gas (LPG) leh tuialhthei te a thlen that thu leh mipuite tan chiaina tur a awm loh thu an sawi a ni.

Supply department tarlan danin nimin thleng khan eirawngbawlina gas bur pangngai (domestic) bur 13,907 stock awmin kawnga thang mek bur 28,011 a awm thu leh Mizoram tana awm mek chu bur 41,918 a nih thu an sawi a. A bur lian chi (commercial), kg 19 a rit chu bur 514 stock awmin kawnga thang mek bur 276 a awm thu leh a vaiin bur 790 Mizoram tan a awm mek thu an sawi a. Tuialhthei lamah pawh petrol kilolitre 1329 chuang stock awm mekin kawnga thang mek kilolitre 470 a awm bawk a. Diesel kilolitre 1,412 chuang stock awmin kawnga thang mek litre 641 a awm tih an sawi bawk a ni.

He tih lai hian Lawngtlai-ah chuan District Magistrate in dan lova tuialhthei chheprelh leh hralhchhuah a khap mek laiin, tun dinhmunah Filling Station 8-te'n Petrol leh Diesel chhek khawlsa an ngah tawk a. Petrol, diesel leh eirawngbawlina gas ah harsatna a awmlah na'n Bawrsap kaihhraina hnuaiah ngun taka enfiah thin niin, District Magistrate chuan dan kalha hralhchhuah a lo khap tawh a, a khat tawkin thuneitute'n an enfiah reng bawk a ni. Report thar berah chuan Lawngtlai District a Filling Station pariat ah petrol chhek khawl sa litre nuai 1, sing 5 leh sang 4, diesel litre nuai 1, sing 7, sang 9 leh 500 a awm mek a, a phurtu kalkawnga thangmek a awm nual a, Filling Station thenkhat chuan dahkhawlina an neih chu dahluh belh theih lovin a khat mek. Lawngtlai DC Pu Donny Lalruatsanga chuan tun dinhmunah Oil leh Gas dinhmun tha mahse, West Asia buaina vangin harsatna thleng thei a nih vangin Filling Station te chu khuahkhirhna dan tha taka zawm tura hrihlin, Sorkarin ruahmanna a neihte ngai pawimawh turin a hriattir a ni.

<><><>

**DEBT**

Tangka kum 2023-24 a Mizoramin a thawhchhuah 'Gross State Domestic Product' (GSDP) chu cheng vaibelchhe 31,917 leh nuai 72 a ni a, he tih lai hian Mizoram sorkarin hemi tangka kuma a leibat zat chu cheng vaibelchhe 12,082 leh nuai 26 a ni a. Mizoram leiba hi a thawhchhuah a tanga chhutin za zela 37 point 85 a tling ani. Tangka kum 2024-25 khan Mizoram GSDP chu cheng vaibelchhe 36,030 leh nuai 66 a tling a, mahse, sorkar leiba chu cheng vaibelchhe 14,637 leh nuai 72-ah kai chhovin sorkar leibat zat hi Mizoram sum thawhchhuah (GSDP) atanga chhutin za zela 40 point 63-ah a kai chho a ni



**CENTER CLARIFIES**

Petroleum & Natural Gas Minister, Hardeep Singh Puri-a'n Iran tiamin India-in ram 40 chuang atangin tuialhthei thlitfim loh a chaw lut tih sawiin a man chungchangah Iran leh India inkarah harsatna a awm lo, a ti bawk.

He thu hi social media-ah tarlangin Pu Puri-a chuan Iran atanga Vadinar, India-a thlen tur, tuialhthei thlitfim loh phur lawng lian, a man inpek danah harsatna a awm avanga China lama pawh pen nia thuthang awm chu thu belhchian dawlo a ni, a ti a, a man chungchangah harsatna a awm lo, a ti.



**FAKE MEDICINE RACKET BUSTED**

Delhi Police Crime Branch-in Delhi leh Uttar Pradesh hmun thenkhatah damdawi lem siamna hmun an hmuchhuak tih Crime Branch Dy Commissioner of Police, Aditya Gautam-a'n sawiin tun thlengin mi 11 man an ni tawh a ti a, heng mite hian

damdawi lem siamin company hrang hrang hmingin an hralh chhuak thin a ni, a ti. Damdawi lem siam hna hi kum 2011-12 atanga kalpui tan tawh an nih thu pawh sawiin ramchhung hmar lam state hrang hrangah an hralh chhuak thin, a ti bawk.



**PM**

Prime Minister Narendra Modi-a'n Keralam, Tamil Nadu, Karnataka, Andhra Pradesh, Goa emaw Telangana emaw eng state pawh ni se, Lok Sabha-a an seat neih zat tih tlem a ni lovang, a ti.

Keralam-a nimina Thiruvalla-a campaign inkhawm neihah he thu hi sawiin Pu Modi-a chuan mihring pung chak lutuk tur ti ti tlem tura hlawhtling taka hmalatu, chhim lam state-te chu Lok Sabha-a an seat neih zat tih tlem a ni dawn nia sawi chu thu belhchian dawlo a ni, a ti.

Pu Modi-a chuan political party zawng zawngte chu Lok Sabha leh state legislative assembly-a hmeichhiate tana seat zaa 33 hauh sak rawtna chu thlawp vek turin a ngen a, kum 2023-a pass tawh hmeichhiate tana seat hauh sakna tur bill chu dan anga hman anih theih Parliament Budget session kal lai chu ni 3-a pawh sei a ni, a ti a, he dan hi kum 2029 atangin hman a ni ang tih a sawi bawk.

<><><>